

國方志叢書·華中地方·第八八八號

據

清·王肇賜等修，陳錫麟等纂
清同治十二年刊本

影印

江 西 省

新淦縣志

(二)

成文出版社有限公司印行

新淦縣志卷之二

建置志

城池

城高池深資於人和然辨方之制與建邑取義均焉
官爲民衛而數忠勸義保固金湯參居錯處於村落
中者作之屏之迺疆迺理一披覽而四境瞭如因編
城池

漢

太平寰宇記載新淦本舊縣輿地志漢時南昌都尉理

此城在清江鎮今樟樹鎮

隋開皇十年移遷南市村卽今縣治未設城

唐

天祐中楊行密據江淮用嚴可求策陞置都制置使李筠乃興版築城周七里西南起南河口東北至董家巷南北門二門城壕西濱大江啟入門東曰春熙曰秀峯南曰玉蟾曰迎仙西曰澄江曰湄湘北曰朝京曰橫波制城亦圯

宋

元祐中張令好古就舊基修繕建八門建炎間兵燬紹興七年喬令璐申請上修議不果行紹定庚寅被贛寇公私廬舍焚掠無遺董令雲才以城堞圯毀舊濠淺狹不足儲水堵禦無備才詠防江軍濬濠視舊闊三倍深亦如之淳祐癸丑永豐峒獠猖獗知軍雷應春以築城請於朝爲浮議所沮

元

至正壬辰紅巾賊陷臨江軍戍卒劉天佑集淦義民鄒民用等樹柵衛淦相持甚久

至正壬寅知州王貞增修歲久址多崩齧

明

正德五年七月廣寇掠縣黎令聰因得請築分守林參
議按闢然僅成土牆卽今址也東西北皆仍舊惟南址
稍縮而北故視昔少隘焉正德九年華林賊起邑有張
元二者入城爲寇白晝磔人劉令天錫沿舊制用磚甃
砌高一丈七尺周七百六十三丈城舖六敵臺二十八
闢七門更東門曰賓陽額曰東山環勝曰迎春額曰湄
湘舒練南曰向明額曰南明宣化曰阜民額曰玉峯露

穎西仍曰澄江額曰西江上游湄湘廢易北曰朝天
曰北極瞻光橫波廢增南挹秀額曰文獻成奇上各建
層樓以備譙望東北二面浚濠三百丈闊六丈深一丈
積水護池惟阜民未浚而城池之制畧備民獲安堵第
砌築弗厚西南之地窪濱江遇漲輒墜嘉靖間屢事修
葺辛酉閩廣寇警鄰郡騷動樂令舜賓增城四尺浚阜
民濠闊一丈濬五尺是年六月寇圍城至三日因樂令
之有備用毒矢火攻殲厥渠魁賊乃宵遁次年春遭淫
雨城不圯者十之五樂令大事修築石未固者堅之磚

單甃者增之垛口卑者高之令縣丞嚴九章復立箭樓
十二於城上尋摧圯崇禎五年流寇凌九萬輩掠境梯
城如入無人之所劉令拯濬濠增壘

是役也懲寇攘之頻臨患防禦之不固劉令拯集議
建謀水部曾樂曾相地度勢計議頗周然日久力艱
矣劉令參而用之城資濠護先務爲急澄江界西一
面贛水爲池有河山之固阜民向明南枕小江挹秀
連東之賓暘迎春秀水潌洄跡雖梗淤功營尙易惟
朝天一隅有橋圍衆濠以達於河者當子午衝衢居

民歲久占沒瓦礫填平爲道維時興役悉按舊額查
復退占令民無弛其禁其事不煩而功倍後人蒙賴
以安焉

十五年霪雨城圯陳令以運出廉俸修葺加固

城池議

此議在嘉靖辛酉後
據乃崇正壬申事

明會樂

余以桑梓之托恆懷杞人之憂常縱觀淦城竊恐其卑
且薄也若更築之爲費滋巨奈何曰其西一面幾三分
之一賴水爲池屹然天塹其東角臨湖池水易涸辛酉
之寇結陣於是鄉賢胡大理嘗議築堤蓄水俾連高士

湖茫然巨浸尤若茲則與南枕小江者皆無庸慮可慮者惟起北河口角東盡賓陽門與夫阜民門一隅耳然不必更築也意於此倣將臺之制以磚石附城而登間四五丈許成一臺厚一丈長二丈則城得益而益固無俟更築之煩坐收堅峻之績矣又若澄江門康衢臨江密邇縣治掩襲可慮仍於此作一月城傍正闢三門其二非時勿啟獨向北一甕以通往來則迂回江岸數百步卒然之變可弭矣或曰彈丸地耳存亡奚賴夫保障江淮非睢陽一城乎臨爲虔吉咽喉而郡偏江左澄

其衝唐末楊行密城之以圖虔明初鄧克明營之以據撫必有說矣使我有金湯可憑則彼退者懼吾之議其後敢蔑視之而縱橫乎過計資此以俟軫地方者采焉按壬申之役令劉拯參用前議集壯丁鱗次濬濠惟澄江門濱江挹秀門屬學外泮秀水濬湖無事開鑿阜民迎春二門濠迹尙存功營差易獨賓暘朝天二門故跡梗淤北門橋匯衆濠以達於河者當子午衝衢居民歲久占沒且填瓦礫橋平爲道令按志額諭稍退占而開濬之捐粟給工民趨事焉

西岸議

明周文培

新淦形勢如汴流之舟龍脉蜿蜒秀靈輿毓惜關攔畧
遠以致大江衝激城郭今漸漸偏城故沿江帶單薄
空虛地界日蹙若非大爲磊築將來胡所底止及今積
粟庀材廣集磚石修補城外堤岸數十百丈奠千年不
拔之基免後日遷縣之患金湯屹然作鎮東表是非茲
邑之首務乎

國朝

順治間潘令岭復修

康熙初年高令檠胡令之琳相繼修築加堅厚焉增設
垛口虎頭牌箭樓器械壁壘一新沿街分立木柵警守
頻備二年湖西道施閏章飭胡令之琳以挹秀門爲淦
巨觀三台朝對桂湖環繞作學宮外泮明季毀塞宜復
開之閼散文風是年舉於鄉者二人次年暴風拔木胡
令捐資重建十年董令謙吉捐俸復修七門城樓惟阜
民爲風雨頃圯十一年鳩工重建五十年王令毓德重
修澄江賓暘迎春城樓三座功未竟次年洪水暴衝城
多沒版於掘秀阜民向明朝天之未加修者圯塌尤甚

遼門整葺完固綜覈前後四五年間砌築城垣計共九百五十丈

乾隆二十六年朱令一深倡議興修適郅篆邑令三寶接理申詳撫部院阿奏明倡勸士民捐資興工經理首事廖峻周城四圍增修長計一千五百餘丈高一丈有餘各門建樓砌築炮臺奉上驗佑動用捐項銀一萬一千五百兩零士民捐輸三百兩以上者奉部議敘二名三十年廖峻添修東門低矮城垛五幫寬窄狹內城計長五丈零增高各一丈零

石岸

康熙五十四年王令毓德捐資砌修澄江門迄晏公廟前河岸八十丈周令文培有議乾隆二十四年朱令一深報上奏明興修護城石岸經理首事廖峻自惠政橋遶城至澄江門迄朝天門一帶河岸石塊甃砌驗估動用捐項銀二萬三千八百九十兩零捐輸三百兩以上者奉部議敘四名

道光十四年五月贛水漲甚衝壞城垣石勘經斌令春倡議並鼓樓同加修築遴選公正紳士舉人陳錫麟周

世鏞楊昶副貢劉狷教職干學松劉嘉惠職員傅志南
鄧洪勲楊國榮周日藹廩生劉鎮增生廖賡颺附監生
鄧家相監生陳煥章勸捐重修於是年十月購料興工
因縣令迭更故工延十餘載未克蒞事至二十六年工
始竣前後計費三萬餘金當卽造冊報銷在案捐生奉
旨獎叙者一百二十餘人首事均議敘八品加一級

街巷

縣署居中城廂四至八達街巷俱從縣署起

南門直街

尙書坊起自北至南直抵向明門

東邊橫街

屏牆東角起自西至東直抵迎春門

西邊橫街

屏牆西角起自東至西直抵澄江門向南轉

東北十字街

自東邊橫街轉灣北抵朝天門東轉東門大街至賓陽門

上坊街

南通阜民門北達世進士坊過衙背抵朝天門

學前街

中抵提秀門左通學後街分通瀨湖出迎春門右達南門大街

賓陽門即大東門

出城上高十嶺大路至短嶺通衢

迎春門即小東門

出城上雙忠廟前通衢

澄江門即大西門

出城通津渡江至界埠通南北驛路

涓湘門即小西門

啟自唐代尋復堵塞乾隆年間興修城垣依舊開復今道光癸未邑紳士

以此門洩越公議者築永不復開呈明宋侯批准存案

挹秀門卽秀峯門

出城卽桂湖門內北達宮牆左通陞祠前右達徐家巷入南門街淦

以此門爲巨觀朝對三台環繞桂湖作學宮外泮前明周侯以羅經天盤壬丙兼亥巳坐危十一度向張十三

度地盤壬丙兼子午爲定向明季毀塞國朝康熙初年胡令之琳照舊修復科第振興乾隆年間

興修城工被堪輿俗師之惑將門向改斜橫抑明堂復滋不利今道光三年公議呈明邑侯宋批允改建乃

相定方向卽舊興工改出前明闕石核之羅盤適用名合當永爲定規毋再更動今自城門闕起直至桂湖塢

石步計長六丈自東至西橫寬三丈九尺此地因舊存窄狹故新買兩邊園地以廣門面

阜民門卽小南門

出城至教場及祥符觀故址

朝天門卽北門

出城至棠公橋東嶽廟傍通衢